

LE
HEROS
PARISIEN
AVX VRAIS
FRANCOIS



A PARIS,
Chez FRANÇOIS NOEL, rue Saint Iacques, aux
Colomnes d'Hercules.

M. DC. XLIX.

LE
HEROS
PARISIEN
AUX VRAIS
FRANCOIS



PARIS
Chez l'Auteur, chez les Libraires, aux
Colonnes de la Bastille.

M. D. C. XLIX



LE HEROS PARISIEN aux vrais François.

HA ! François, c'est icy qu'il nous faut monstrier dignes de nos Peres: Il ne s'agit plus de secourir des Alliez, de soulager des Princes affliges, de porter les preuues de nostre valeur iusques aux regions les plus reculées. Il s'agit de nous retirer nous-mesmes de nos maux, de nous descharger du faix, où nous succombons, de mettre fin à nos peines. Il s'agit de chastier le voleur de nos biens, l'autheur de nos ruines, d'aneantir qui a succé le sang de nos veines, arraché le pain de nos enfans, & qui encore se rit de nos miseres, qui nous bat de nos forces, nous rait nostre Roy, seduit de nos Princes: Enfin, François, il s'agit de confondre, qui nous braue; & qui nous braue chez nous, dans nos maisons, au cœur de la France: en faut-il dauantage? ce mot seul de brauer vous choque indubitablement (braues Compatriotes) & ce vous est vne chose si peu connue, que de vous voir brauez: à vous, qui iusques icy auez tousiours si bien secouru ce que c'est que de brauer les autres: qu'il semble, que la signification mesme du mot vous en soit estrange: & il n'est pourtant que trop veritable, que, s'il vous choque donc, que ce soit pour en faire rebondir vos coeurs

de colere, briller vos yeux de fureur, & animer le reste de tous vos autres membres à leur viuacité sur-acoustumée; que ce soit pour assouir vostre ressentiment, dans le sang d'un si temeraire: pour ne pas oublier, de qui vous estes nais, & pour vous ressouuenir du nom que vous portez: de ce Nom iadis si formidable à vos ennemis, si considerable à vos allies, & si recommandable pour vous-mesmes: De ce Nom qui a fait rendre des Villes, subiuguer des Prouinces, trembler des Empires: qui a passé iusqu'aux Nations les plus estrangeres: s'est fait iour entre les peuples les plus feroces, & s'est acquis la gloire des plus grands hommes qui parurent iamais. Ha! Cesar, où est ce temps que vous appelliez le tumulte François la guerre, que nous vous liurions, pour sa vigueur, que vous n'apprehendiez rien tant à vos Romains, que nostre courage: & que vous vous contentiez de nos petites forces, pour vous rendre Maistre absolu d'un Empire si grand: Ce temps n'est plus (Cesar) & ces François sont encore: les voilà, qui sensiblement touchez au cœur des glorieux exemples de leurs braues ayeuls, r'allument ce feu tout brillant de leurs esprits comme à demy amorty sous les cendres de leurs miseres: les voilà, qui ont honte d'auoir tant demeuré, qui renflamment ce cœur tout seigné d'une nouuelle colere, & qui crient desia tout haut, qui les veut conduire, & où il faut aller: n'est-il pas vray (François) y a-t'il quelqu'un d'entre vous qui voulut me démétir de ce que ie viés de dire, qui ne reconnut pas d'ingenuité de mes sentimens, & qui n'apperceut pas que ce que i'ay aduancé

aduancé iusques à present, ie ne l'ay aduancé que pour son interest, & pour la gloire. Et toy, qui void ces lignes, en verité voudrois-tu soupçonner mes intentions de quelque amour propre? voudrois-tu en douter? Non, ie te le iure, ie ne le fais ny pour bien dire, ny pour bien parler, mais pour bien exciter, mais pour porter la rage au cœur d'un ennemy si abominable. Au Courage donc, François, au Courage: perir, où vaincre: remporter le dessus, ou mourir. Hé! ne nous souffrons point accabler sous nostre propre faix: sous le rapt, que fait du fruit de nos labeurs un estrange: & un estrange, qui s'en mocque: qui le fait à nos propres yeux, à nostre propre barbe. N'auons nous donc pristant de peine, tant trauaillé à la sueur de nostre corps, que pour voir enfin un homme, raurir en un iour, tout le fruit de nos trauaux, & de nos peines, Ah, François, auons-nous du cœur. Un vermisseau de terre se redresse contre celuy qui le veut couper, & contre qui nous tire iusqu'aux entrailles, il semble que nous nous contentions de parler, que craignons-nous? la mort. Hé! où nous en fera-t'on souffrir vne plus rigoureuse? Helas! ie vous fais vous-mesmes iuge de nostre martyre: Iugez vous mesme, nous n'auons rien que nous puissions dire estre à nous: personne ne peut plus subsister. Cherchez de quelle condition, que ce puisse estre, à moins que ce ne soient, ou Partisans, où Monopoleurs: vous ne les trouuerez que parmy des debtes. Les trois Estats n'en peuuent plus, la Iustice ne va point, les Nobles ne sont point paycz, & demandez à ces pau-

ures gens, qui se tuent le cœur, & le corps, à trauailler toute vne année, pour qui ils se donnent tant de tourmens? ils vous respondront que ce n'est pas pour eux. Et pour qui donc, pour le Roy. Je n'ay que faire de vous le dire, vous le sçauiez mieux que moy. Encore, si c'estoit pour le Roy, bien qu'autrefois mesmes nos Peres ayent eu peine à beaucoup moins en supporter, aurions-nous tousiours quelque consolation dans nos pertes. Nous pourrions dire que Dieu nous ayant donné des Roys, leurs auroit donné quant & quāt pouuoir sur nos vies & sur nos biens, & en auroit reserué le rendre compte à sa iustice. Cette haute obeyssance, passeroit en estonnement à ceux d'apres nous, nos descendants ne s'en ressouuiédroient iamais qu'avec des larmes. Et les estrangers calomnieroient moins nostre vertu, qu'ils ne deploreroiēt nostre infortune. Mais qu'un homme, qui n'a de pouuoir, que ce que nous luy en auons voulu donner, qui ne tient ce qu'il tient que de nous: Que cet homme nous arrache iusques au cœur chez nous, qu'il nous l'arrache, & que nous le souffrions: Ah! c'est ce qui se trouue si peu imaginable, qu'il faut, ou auoir du tout perdu le sens, ou necessairement se confesser les plus intimidez des hommes, pour le permettre, Quoy donc, François, quand il n'y auroit point d'autre subiect, que l'insolence d'un homme, que nous auons esleué, qui nous fait la loy: quand il n'y en auroit point d'autre, que celuy d'estre tenus timides, pourrions nous retenir nostre courage, où auons nous les yeux? Vn imprudent nous dira vn mot, & nous voylà choquez, & nous voylà aussi tost au danger de nostre vie, pour

nous vanger de son imprudence : Et pour sauuer & nos biens, & nostre honneur, & nostre renom, & nos vies mesmes, nos enfans, & celles de nos femmes, le tout que nous auons de plus cher au monde, nous craindrons de nous mettre au simple danger de mourir; car vous voyez fort bien qu'il n'est pas mesme en nostre possible de les en exempter de ce costé-là. Desja la pluspart qui n'ont plus sçeu resister à tant d'impositions qu'on leur demande, ont laissé à l'abandon leurs maisons, & se sont exilés de la cognoissance de leurs amis, pour s'en aller à la mercy des temps incogneus avec leurs familles. Imaginez vous que peut deuenir alors vn homme, qui se voit tout perdu: qui ne sçait quel chemin il doibt tenir, & où il doibt tendre : de quel œil il peut enuifager vne femme, & des enfans, qu'il n'a plus desormais à soulager que de ses larmes : & s'il ne prefereroit pas mille fois demourir, s'il le pouuoit, pourueu qu'il treuuast le moyen de les retirer de ce dernier comble de leurs miseres. Hômes, ie vous en prends à tesmoings i'en sçay, & i'en cognoy: & si ie l'ose dire d'assez apparêts, qui ont bien esté contraints à de semblables choses, de vous dire cōbié de-jà il y en a eu, qui sont morts de faim parmy le commun. Combien, qui se sont abandonnez au mal par cette voye ! C'est vn spectacle si deplorable à vous raconter, & si fort ennuyeux à vous descrire, qu'il vous suffira d'en iuger la verité dedans mon silence, les vns, & vous l'auiez peut-estre appris aussi bien que moy, ont esté trouuez roides estendus sur le carreau apres auoir esté des neuf iours entiers sans rien prendre, ceux cy ont cherché à se sustenter d'un pain (chose pitoyable !) que les chiens mesme n'auroient seulement pas voulu regar-

der, & en sont morts, & ceux là se sont tellement saisis le cœur, de se voir emporter iusqu'à leur pailleſſe, qu'ils n'en ont plus du depuis que trainé leur vie; & le tout par la meſchanceté d'un homme. Maudit homme qu'il euſt bien mieux vallu pour toy, que tu ne fuſſe point nay, que d'eſtre toy ſeul la cauſe de tant de deſolations & d'homicides. La vengeance du Ciel, pour vne milliaice de bonnes ames qui ont pâty, te talonne, ſon couroux te preſſe, & ſa puiffance te reſerue pour la Cataſtrophe de cette tragedie. Allons François, c'eſt pour nous que le Ciel a pris les armes, & c'eſt par nous qu'il le veut punir. Ne diſons plus que nous auons à ſauuer nos vies, nos biens, nos hôneurs, noſtre renom, nos femmes, nos enfans, tout ce que nous ſommes, & ce que nous poſſedons: diſons qu'il faut mourir pour Dieu, & pour le Roy, & qu'il y va de la gloire de celuy que nous adorôs de courir à la mort, ou de perdre vn homme, vn ſacrilege, vn prophaneur des choſes ſainctes, vn Athée, qui ne recognoit de Dieu que pour ſon proffit: qui n'eſt monté au degré des plus illuſtres de ſon Eglise que pour ſa propre gloire, & qui n'a brigué ce rang de Cardinalat en noſtre France, que parce qu'il n'en auoit point à tenir. C'eſt cet homme qui n'opprime ſeulement pas, n'y pour les veufues, n'y pour les orphelins: mais qui porte ſon enragée auarice iusqu'à tout vn peuple. Voylà François, contre qui nous faut combattre, pour qui nous deuons tenir, faictes le choix des deux, ou de mourir, & les voſtres dans la miſere, ou de vanger l'honneur de Dieu, le Roy, les voſtres, & vous.